

Chantai, givlai, o Israel!

Forsa avain nus in pau difficultads da chantar quest refrain, perquai che Israel è per il mument tut auter che in lieu d'allegria. Nus stuain dentant far atenziun e betg identitgar il "Israel" da la Bibla cun il stadi actual che porta il medem num. Malavita capita quai tar amis sco era inimis dals Gidieus: Tut tenor po lura la regenza d'Israel sa prestar las pli grondas malgiustias, perquai che ella sco elegida da Dieu dastgia far tge ch'ella vul. E d'otra vart dat mintga malgiustia chaschun da svegliar l'antisemitissem. Il num Israel appara per l'emprima giada en la Bibla suenter la cumbatta da Jacob al flum Jaboc. Dieu al dat al patriarc sco benedicziun. Cun quai renovescha el a medem temp l'empermischun ad Abraham da far d'el in pievel grond che vegn a star en il pajais empermess. La cuntinuaziun da quest'istorgia d'empermischuns n'è betg constanta. Surtut quella per il pajais, nua che latg e mel culan (Ex 3,8 ed a.) resta enfin ussa nunaccomplida, cun excepziun da cumenzaments durant la curta epoca dals retgs David e Salomon. Per quai è "Israel" vegni enclieg vi pli en maniera spirituala. Uschè po Paulus en sia brev als Romans 9-11 attribuir a las cristianas ed als cristians d'appartegnair al vair Israel, tuttina ch'els èn da derivanza gidieua u da derivanza pajauna. Criteri n'è betg pli la derivanza u privilegis u prestaziuns umanas, mabain sulet la misericordia da Dieu (Romans 9,16) e nossa resposta a quella: la cretta, en la quala nus survegnin gustia (Romans 9,30) e la confessiun a Cristus tras il qual nus vegnin salvads (Romans 10,9). A medem temp resta quai cler a Paulus che il salid vegnia dals Gidieus (Joannes 4,22, cfr. Romans 11,11). Perquai appartegnain nus cristianas e cristians na be cumpletmain nunmeritadamain ed or da spira grazia ad Israel. Nus nun ans dastgain er betg auzar sur Israel, perquai che nus essan sco roms d'in uliver selvadi e mal fritgaivel ch'èn vegnids oculads en in uliver custaivel. Be uschia survegnin nus part da la ragisch e dal grass da l'uliver. Adina ans dessan nus esser conscients: « Betg ti na portas la ragisch, mabain la ragisch porta tai. » (Romans 11,18). Sche nus chantain damai "Chantai, givlai!", lura esprimin nus d'ina vart nossa reconuschienscha che Dieu en sia cumpassiun infinita ans lascha participar a las empermischuns ad Abraham. D'otra vart chantain nus en la speranza che Israel daventia ina giada concretmain il lieu da l'allegrezza. Lura sa vegnan ad accumplir las profezias dal cudesch da Jesaja, ch'ils pievels vegnan a far pelegrinadi a Jerusalem per chattar là la pasch cun Dieu e tranter pèr (Jesaja 2,2-4). Quai demussa: Nus na dastgain betg senz'auter identitgar il Israel biblic cun quel preschent. E tuttina è quel blier dapli che ina grondezza spiramain spirituala, dapli che ina utopia, che spetga nus pir en l'auter mund. Israel è il reginavel da Dieu, nua che regnan giustia e pasch, quel ambient ch'è gia ussa preschent tranter da nus (Lucas 17,21), sche nus avrin noss cors per quel Dieu che en Jesus daventa uman per ans reconciliar cun el e tranter pèr.

Thomas Muggli-Stokholm